

ԱՂՕԹՈՂ ՄՕՐ ՄԸ ԶԱՄԱԿԸ ՉԻ ԿՈՐՍՈՒԻՐ

Ինչպէս քանդակագործը կրնայ անտաշ քարի մը կտորը տաշել եւ զայն վերածել գեղեցիկ պատկերի մը, այնպէս ալ մայր մը կրնայ իր գաւակին անտաշ հոգին տաշել եւ արտասուախառն աղօթքներով եւ Աստուածահաճոյ յորդորներով ու խրատներով զայն փոխակերպել Քրիստոսի պատկերին: Արդարեւ, աղօթող մայրը քանդակագործ մըն է, որուն առաքինութիւնն է՝ Քրիստոսի պատկերը դրոշմել իր գաւակներուն հոգիին մէջ:

Ուստի, որքա՛ն կարեւոր է աղօթող մայր ըլլալը: Որքա՛ն կարեւոր է, որ տունի մը մէջ աղօթող մը կամ աղօթողներ ըլլան: Ընտանիք մը, որուն մայրը աղօթքի նուիրուած է՝ հաստատ կը մնայ: Զուակ մը, որ աղօթող մայր ունի՝ չի կորսուիր եւ եթէ կորսուի՝ դարձեալ կը գտնուի: Չի մոլորիր եւ եթէ մոլորի՝ դարձեալ ուղղութեան կու գայ: Չի հեռանար երկինքի ճամբէն եւ եթէ հեռանայ՝ դարձեալ այդ ճամբուն կը դառնայ:

Տուն մը, որուն մայրը աղօթող է՝ հոն ապահովութիւն եւ խաղաղութիւն կը տիրեն: Եթէ այդ տան մէջ փորձանք մը պատահի, Աստուած օգնութեան կը փութայ: Եթէ մահ ըլլայ՝ Սուրբ Հոգին իր մխիթարութիւնը կը հեղու տան սգաւոր անդամներուն վրայ:

Միբելի մայրեր, դուք ձեր աղօթքներով պահապան եւ պաշտպան կը դառնաք ձեր ընտանիքին եւ գաւակներուն: Անդադար աղօթեցէ՛ք առանց վիատելու:

ՅԱՅՏԱՐԱՐՈՒԹԻՒՆ

**ՅԱՅՏԱՐԱՐՈՒԹԻՒՆ
ԵՐԵՔՇԱԲԹԻ ԳԻՇԵՐՈՒԱՆ
ՍՈՒՐԲ ՊԱՏԱՐԱԳ ԵՒ
ՀԱՅ ՔՐԻՍՏՈՆԷԱԿԱՆ ԿԵԱՆՔԻ
ՔՆՆԱՐԿՈՒՄ**

Կազմակերպութեամբ Կրօնական ժողովին եւ Ազգային առաջնորդարանի «ԱՅՈ» երիտասարդական յանձնախումբին, ամէն երեքշաբթի գիշեր, ժամը 7:00-8:00, Պուրճ Համուտի Ս. Վարդանանց եկեղեցւոյ մէջ, սուրբ պատարագ պիտի մատուցուի:

Սուրբ պատարագը պիտի երգէ հաւատացեալ ժողովուրդը: Հոգեւոր խորհրդածուծիւն պիտի կատարէ Լիբանանի Հայոց առաջնորդ՝ Գերշ. Տ. Նարեկ Արքեպիսկոպոս:

Նաեւ, ամէն երեքշաբթի գիշեր, ժամը 8:00-9:00, Ազգային առաջնորդարանի «Երջօ Սամուէլեան – Եռագոյն» սրահին մէջ, Արժ. Տ. Ղեւոնդ քհն. Լոշխաճեան Աստուածաշունչի սերտողութիւն պիտի կատարէ մեր ժողովուրդի գաւակներուն համար:

Միբելի ընթերցող, ճՐԱԳ թերթը ամէն Կիրակի կը բաժնուի մեր ժողովուրդին, եկեղեցիներու բանկային մօտ: Նաեւ՝ Facebook-ի վրայ փնտռել «Jerak կամ ՃՐԱԳ», ապա սեղմել «Like»-ը, կարդալու կամ անդամագրուելու համար:

ՀԱՍՑԷ.

ՃՐԱԳ ՇԱՐԱԹԱԹԵՐԹ - ԱԶԳԱՅԻՆ ԱՌԱՋՆՈՐԴԱՐԱՆ ԼԻԲԱՆԱՆԻ - Bourj-Hammoud, P.O.Box 80810 - Tel/Fax:01-258300 – facebook-ի էջ jerak Ծրագր թերթ



ՔՈՒ ԽՕՍԵԴ ԽՍ ՈՅԵՐՈՒՄ ԵՐԱԳ Է ՈՒ ԽՍ ԵԱԽՂՆԵՐՈՒՄ ԼՈՅՍ (Ս. 119.105)

ԺԲ. ՏԱՐԻ ԿԻՐԱԿԻ, 1 ԴԵԿՏԵՄԲԵՐ 2019 ԹԻՒ 48

ԿԻՐԱԿԻ ՕՐԵՐՈՒ ԱՍՏՈՒԾԱՇՆՉԱԿԱՆ ԸՆԹԵՐՅՈՒՄՆԵՐ
Ես. 36.22-37.11: Ա. Թս. 4.1-11
ՅԻՍՈՒՄ ՔՐԻՍՏՈՍԻ ԱՒԵՏԱՐԱՆԸ ԸՍՏ ՂՈՒԿԱՍ 13.1-9

**ՅԻՍՈՒՄ ՔՐԻՍՏՈՍԻ ԱՒԵՏԱՐԱՆԸ
ԸՍՏ ՂՈՒԿԱՍԻ
13.1-9**

Ոմանք եկան Յիսուսի եւ պատմեցին այն գալիլիացիներուն մասին, որոնք Պիղատոսի կողմէ սպաննուեցան, երբ Աստուծոյ զոհ կը մատուցանէին: Յիսուս անոնց ըսաւ. «Կը կարծէ՞ք թէ սպաննուող գալիլիացիները միւս բոլոր գալիլիացիներէն աւելի մեղաւոր էին, որ այդպիսի վախճան մը ունեցան: Ո՛չ: Կ'ըսեմ ձեզի, որ եթէ չապաշխարէք՝ դուք բոլորդ ալ նոյնպէս պիտի մեռնիք: Կամ ի՞նչ կը մտածէք այն տասնութ մարդոց մասին, որոնց վրայ ինկաւ աշտարակը Սելվամի մէջ եւ սպաննեց զանոնք: Անոնք աւելի՞ յանցաւոր էին, քան՝ Երուսաղէմի բոլոր բնակիչները: Ո՛չ: Կ'ըսեմ ձեզի, որ եթէ չապաշխարէք՝ բոլորդ ալ նոյնպէս պիտի մեռնիք»:

Անոնց հետեւեալ առակը պատմեց. Մարդ մը կար, որ իր այգիին մէջ թգենի մը տնկած էր: Երբ ժամանակը եղաւ թուզ քաղելու գնաց, բայց թգենիին վրայ պտուղ չգտաւ: Այգեպանին ըսաւ. «Այս երրորդ տարին է, որ կու գամ թուզ քաղելու, բայց չեմ գտներ: Ուստի կտրէ՛ զայն, ինչո՞ւ անիմաստ կերպով տեղ գրաւէ»: Այգեպանը պատասխանեց. «Տէ՛ր, թող այս տարի ալ մնայ: Ես իր շուրջի հողը կրկին կը փորեմ եւ պարարտացուցի կը դնեմ: Այս ձեւով թերեւս պտուղ տայ, ապա թէ ոչ՝ գալ տարի կտրէ զայն»:

«Տէ՛ր, թող այս տարի ալ մնայ: Ես իր շուրջի հողը կրկին կը փորեմ եւ պարարտացուցի կը դնեմ: Այս ձեւով թերեւս պտուղ տայ, ապա թէ ոչ՝ գալ տարի կտրէ զայն»: Այս խօսքը կը վերաբերի բոլորիս: Միշտ մեր տէրը առիթներ կու տայ մեզի վերանորոգելու մեր կեանքը: Օգտուիմք Աստուծոյ կողմէ մեզի տրուած առիթէն: Ապաշխարեմք, դարձի գանգ, թօթափեմք մեր մեղքերը խոստովանութեամբ եւ ապաշխարութեամբ, որպէսզի երբ Տէրը այցելէ մեզի ըլլանք պտղատու ծառեր:

ՄԱՐԳԱՐԵԱԿԱՆ ԳԻՐՔԵՐ
ՊՕՂՈՍ ԱՌԱՔԵԱԼԻ ՆԱՄԱԿՆԵՐ

ԵՍԱՅԻ ՄԱՐԳԱՐԷԻ ԳԻՐՔԷՆ
36.22--37.11

Քեդկիայի որդի Եդիակիմը, որ արքունի հազարապետն էր, հրովարտակներու քարտուղար Սոմնասը եւ Ասափի որդի Յովաքը, որ արձանագրութիւն պահող քարտուղարն էր, իրենց վերարկունները պատռած՝ եկան Եգեկիա թագաւորին մօտ եւ Սենեքերիմի հրամանատարին խօսքերը փոխանցեցին:

Եգեկիա երբ լսեց, իր հագուստները պատռեց, քուրձ հագաւ եւ ելաւ Տիրոջ տաճարը գնաց եւ Եդիակիմ հազարապետը, քարտուղար Սոմնասն ու տաճարի քահանաներէն ծերերը, բոլորն ալ քուրձ հագած, դրկեց Ամոսի որդի Եսայի մարգարէին քով, որպէսզի անոր ըսեն. «Եգեկիա այսպէս կ'ըսէ. Այսօր սուգի, նախատինքի, կշտամբանքի եւ բարկութեան օր է: Ծննդական կնոջ պէս՝ երկունքը բռներ է մեզ, բայց ոյժ չունինք ծնանելու: Թող քու Տէր Աստուածդ լսէ, թէ ինչ կ'ըսէ Ասորեստանի թագաւորին հրամանատարը, որ իր տիրոջ կողմէ դրկուեցաւ կենդանի Աստուածը նախատելու ա'յն նախատական խօսքերով, որ քու Տէր Աստուածդ լսեց: Արդ, հարցուր քու Տէր Աստուածոյդ, ի՞նչ պիտի ըլլայ մնացողներու վիճակը»:

Երբ Եգեկիա թագաւորին ծառաները Եսայիի քով եկան, Եսայի ըսաւ անոնց. «Հետեւեալը ըսէք ձեր տիրոջ. Այսպէս կ'ըսէ Տէրը. Մի՛ վախնար այն խօսքերէն, որ լսեցիր եւ անոնցմով Ասորեստանի թագաւորին պատգամաւորները զիս նախատեցին: Ահաւասիկ ես անոր հոգին պիտի խռովեմ այնպիսի լուրով մը, որ ստանալուն պէս իր երկիրը պիտի վերագառնայ եւ հոն սուրով պիտի սպաննուի»:

ՊՕՂՈՍ ԱՌԱՔԵԱԼԻ ԱՌԱՋԻՆ ՆԱՄԱԿԸ
ԹԵՍԱՂՈՆԻԿԵՑԻՆԵՐՈՒՆ

4.1-11

Այսպէս ուրեմն, եղբայրներ, մենք ձեզի սորվեցուցինք, թէ ինչպէս պէտք է ապրիլ Աստուծոյ հաճելի ըլլալու համար: Թէեւ այդպէս կ'ապրիք արդէն, սակայն կը խնդրենք եւ Տէր Յիսուս Քրիստոսի անունով կը թելադրենք, որ շարունակէք յառաջանալ ներկայ ձեր ընթացքին մէջ: Գիտէք, թէ ինչ պատուէրներ տրւինք ձեզի Տէր Յիսուսի անունով, որովհետեւ Աստուծոյ կամքն է, որ դուք սրբուիք եւ ամենեւին հեռու մնաք պոռնկութենէ: Ձեզմէ իւրաքանչիւրը թող սրբութեամբ ու պատուով ամուսնանայ: Կրթոտ ցանկութիւններու անձնատուր մի՛ ըլլաք հեթանոսներուն պէս, որոնք զԱստուած չեն ճանչնար: Կամ չըլլայ, որ մէկը եղբօրը դէմ մեղանչէ անոր կիներ յափշտակելով, որովհետեւ այդ բոլորին համար Տէրը իր դատաստանին մէջ անողոք պիտի ըլլայ, ինչպէս սկիզբէն ըսինք ձեզի եւ ազդարարեցինք: Մի՛թէ Աստուած մեր պղծալից կեանքը շարունակելով հրաւիրեց մեզ, թէ սրբութեամբ ապրելու: Անշուշտ թէ սրբութեամբ ապրելու: Հետեւաբար ով, որ սրբութեան այս պատուէրը կ'արհամարհէ՝ մարդ մը անարգած չ'ըլլար, այլ՝ նոյնինքն զԱստուած, որ իր Սուրբ Հոգին կու տայ ձեզի:

Իմաստունին համար օրէնքը կեանքի աղբիւր է, մինչ անմիտը թակարդը իյնալով պիտի մեռնի: Բարեմտութիւնը շնորհք կը պարգեւէ եւ օրէնքի ճանաչողութիւնը բարի միտքերու յատուկ է, մինչ օրինազանցները կորստեան կ'առաջնորդուին: Առակ. 13

ՍՈՒՐԲԵՐ ԵՒ ՏՕՆԵՐ

Ս. ԹԱՂԷՈՍ ԵՒ Ս. ԲԱՐԹՈՂԻՄԵՈՍ ԱՌԱՔԵԱԼՆԵՐՈՒ ՏՕՆ

Ամէն տարի Դեկտեմբեր ամսուան ընթացքին կը յիշատակուի Յիսուսի առաջին աշակերտներէն՝ Ս. Թաղէոս եւ Ս. Բարթողիմէոս առաքելներուն տօնը: Անոնք Հայաստանի մէջ Քրիստոնէութեան փարոզութիւնը սկսած են կատարել առաջին դարէն սկսեալ, Յիսուսի համբարձումէն ետք:

Հայաստանը այդ օրերուն կը նկատուէր կարեւոր եւ բազմամարդ երկիր: Ս. Թաղէոսի եւ Ս. Բարթողիմէոսի կը վիճակուի Հայաստանէն ներս Քրիստոնէութիւնը տարածելու դժուար գործը տրուած ըլլալով, որ այդ տարիներուն հայ ժողովուրդը բազմաստիճան կրօն ունէր:

Ո՞Վ ԷՐ Ս. ԹԱՂԷՈՍ

Յիսուսի 12 աշակերտներէն մէկն է: Յայտնի չէ, թէ երբ ծնած է, բայց նահատակուած է իր փարոզական առաքելութեան ցամբուն վրայ շուրջ 46 թուականին:

Թաղէոս առաքել կը յաջողի քրիստոնէութեան կրօնը տարածել հայոց արքունական պալատէն ներս քրիստոնէայ մկրտելով Սանդուխտ կոյսը, որ Սանատրուկ թագաւորին աղջիկն էր: Թագաւորը կը փորձէ իր աղջիկը վերադարձնել բուրմբու պաշտամունքին եւ ձախողելով սպաննել կու տայ թէ՛ Սանդուխտ կոյսը եւ թէ՛ Թաղէոս առաքելը: Մինչ այդ Արտագաւառի բնակչութիւնը հետեւած ըլլալով Ս. Թաղէոսի փարոզութեան, անոր յիշատակին կը հիմնէ Թաղէի վանքը շուրջ 66 թուականին, որ դարերու ընթացքին կը դառնայ հայ ժողովուրդի հոգեւոր կեդրոններէն մէկը:

Ո՞Վ ԷՐ Ս. ԲԱՐԹՈՂԻՄԵՈՍ

Բարթողիմէոս Յիսուսի 12 աշակերտներէն մէկն էր: Անոր կը տրուի նաեւ Նաթանայէլ անունը, որ կը նշանակէ «Աստուծոյ Նուէր»:

Ան քրիստոնէութիւնը փարոզած է Հնդկաստանի, Պարսկաստանի, Արաբիոյ եւ Հայաստանի մէջ: 66 թուականին տեղի ունեցած է իր նահատակութիւնը:

Բարթողիմէոս կը նկատուի Ս. Թաղէոս առաքելին հետ Հայաստանի մէջ քրիստոնէութեան առաջին փարոզիչը:

Առաքելը Հայաստանի մէջ իր փարոզական աշխատանքը սկսած է Գողթան գաւառէն, ապա Սիւնեաց, Արարատեան եւ Վասպուրական նահանգներուն մէջ: Ան կը յաջողի նաեւ հայոց արքունի շրջանակներէն ներս ալ փարոզութիւն կատարել: Քրիստոնէայ կը մկրտէ Սանատրուկ թագաւորին փոքր՝ Ոգուհին եւ հազարապետ Տերենտիոսը: Հետեւանք այն կ'ըլլայ, որ թագաւորը սպաննել կու տայ թէ՛ փոքր, թէ՛ հազարապետը, թէ՛ առաքելը:

Հայ ժողովուրդը ի յիշատակ Ս. Բարթողիմէոսին, չորրորդ դարուն Վասպուրականի Աղբակ գաւառին մէջ կը շինէ վանք մը, որուն չորս աւանդատներէն մէկուն մէջ գոյութիւն ունի տապանաքար մը, վրան արձանագրուած, թէ հոն թաղուած է Ս. Բարթողիմէոս Առաքելը:

Վանքը ներկայիս կիսաւեր վիճակի մէջ է:

Շնորհիւ Ս. Թաղէոս եւ Ս. Բարթողիմէոս առաքելներուն Հայաստանեայց մայր եկեղեցին **ԱՌԱՔԵԼԱԿԱՆ** կը կոչուի Յիսուսի առաքելներու նախաձեռնութեամբ հիմնուած ըլլալուն համար: